



STINAPA TA INFORMA

SOLO

Lo bo no kere. Pero poko hende sa ku Amado Felix, e doño di e búsnan hel ku ta kore ku turista i ku ta transportá muchanan di skol, ta un amante di aviashon. E ta yu di defuntu Achi Felix i Manira Felix-Saleh. Tantu e komo su kasá ta vários aña aktivo den e sektor turístiko. Promé ku el a tuma e negoshi di bús di su tata over na komienso di añanan 70 di siglo pasá, el a traha na TWR i na Salt Company. Amado ta masha korto ora puntr'é unda ta su sitio favorito na Boneiru. "Tur kaminda" e ta kontestá. "Kada parti di Boneiru tin su 'charme'. For di por ehèmpel Seru Largu, kaminda bo por wak e streanan bunita, te Washington Park ku su partinan asina bunita i úniko. Tur ta mesun bunita na nan manera" Amado ta haña. Lokual ta lag'é sinti masha orguyoso ta ku solo ta sali tur dia. El a biaha i biba afó pa poko tempu i sa kon importante e sentimentu ta pa wak e bunita klaridat i energia di solo ku ta sali 365 dia pa aña. E ta totalmente di akuerdo ku e kampaña di STINAPA na e momentu aki. E ta bisa ku STINAPA a splika 'loud and clear' dikon e naturalesa ta asina importante pa nos ekonomia i pues pa kada un nos entrada. Ta masha fásil, turistanan ta trese entrada, nan ta bini Boneiru pa su naturalesa. E entrada di turismo ta bai pa diferente otro sektornan na Boneiru. Un kampaña asina ta esensial ya ku Amado tin su preokupashon pa e naturalesa di Boneiru. Kasualmente el a bula último den avion riba Lac. El a konstatá ku tin ménos pal'i mangel ku e ta kustumá di wak ántes. Segun Amado ta e santu ta kousa esaki. P'esei e ta boga pa sigui ku e kampaña pa konsientisá pueblo. I spesialmente pa no bin ku konstrukshon den áreanan protehá. Na mes momentu Amado ta kere den balansa. E no ta bisa pues ku no mester tin desaroyo. Boneiru mester progresá. E ta uza e dicho Hulandes. "Nos tin ku haña e gulden middenweg". Pues un balansa entre e dos opshonnan: naturalesa i desaroyo ekonómiko".
Skirbí pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru